

CICIKOANBÁDIEGU

BULICINA FASO

Ti baa dógú pò, li yaa dani kúuma, ti baa paadí

GUFENEMA MASOAGINDO

**BÀALÓ KOANBÁLA TÁÁNLI
JÁGA DOAGIDIMA**

(PP-G N°022-2026)

Pengidiwende Silibeedi WEDIRAWOGO

Wagidugu, li binli 2026 cillele dana 02

Báaló Koanbála táánli den kàli Wagidugu
nani ban mááni ki tiédi màamà dana lele kúli,
li binli 2026, cilele dana 02, alaamuda daali
ki cili leeri 9 yogunu ki ban gbeni leeri 12 leni miniti 51,
Kapitenni Ibirayimi TARAWORE, yua n tié ti Diema Yudanciamo
leni a Koanbála Táánli Lìgìyúa n den gobidi laa táánli.

A Koanbála Táánli den noanli li daali máyùla nni
ki tàà a jága, ki púni i làabáali,
ki dini bi niba a bála li tuonli pò,
ki púni u sànú bi niba n gedi dietoama nni ti diema yèli pò.

I. A JÁGA

I.1. YAA KOANBADIEGU N DIIDI BU KPAABU, MI ÑIMA, LI YANWUBILI LENI MI ÑIMA NNI BONPIAKAALA TUONA KANI

A Koanbála Táánli táá **másienkaama tiyenli** ki tùó mi diema kpenciami cágili mabilikaama tila.

Laa másienkaama tili táama baa teni mi diema kpenciami cágili n bàà yaa báli máama tila n dagidi ki yaa tuuni li tuona nani yaa másienkaama tili lanba n tie n°2014-614/PRES/PM/MEF, ban den táá yaali li binli 2014, cilele dana 24 ki waani ban ñani Bàaló tuonsoanjaana ya die u loagu tuona po yaa mabilikaama.

I.2. YAA KOANBADIEGU N DIE U LOAGU LENI I LIGI KUBIMA TUONA KANI.

A Koanbála Táánli táá **másienkaama tila taa (03)**.

Mi másienkaama tikpiali waani ke bi baa cilini mi diema nni mi tagima sani bandicianma cogidieli « ATEYEFI ».

Mi tagima sani bandiciama cogidieli mi diema nni máyùli tie ki bangi bi niba mi tagima sani bandicianma yaala n tie ti kudi tuona nni, a masina ñanbima nni, kuuran leni o kuuranciamo tagima nni, i biakaabi tagima tuona nni, a diegbenga maama tuona nni, li bontagikaala boginma tuona nni, mu tinmu tugu nni piama lingima tuona nni, enterineti tuonsoantiadi tuona bandima nni, enterineti tuonsoantiadi guunli nni leni i làabáali tenma tuonsoantiadi tuoana bandima nni.

ATEYEFI cogidiecianli yeni luodima mi diema nni tuugi leni ti yùcela diedimoanma nunlema yaama n ñii mi diema niba tuonbanma pugincianma po leni u cogu moanu todima nilo kuli po. Laa cogidiecianli luodima po, ban sugini yaala tie ki teni bi niba n yaa bààdi ti diema nni mi bancianma leni mi tagima sanbiciama bangima, ki pugini mi diema nni mi tagima leni mi bancànma lingima tuona.

Mine másienkaama tili táama baa teni ban cilini mi diema nni mi tagima sani bandiciama cogidiecianli.

Mi másienkaama tilieli tuugi leni mi diema kpenciami càgìli cilima.

Li bua ki pundi bina piitaa hali Bulicina Faso n táá li jagili ki baa yaa kpeni n ye ñima bonpiakaala kubima (SIRI), ki teni ke li tie nannanli mi ñima bonpiakaala yema ñamu po. Li yaa po, bi den táa li binli 2003 mi ñima nni bonpiakaala kubiñanma tuona sanbili (PASIRI), ki cilini mi ñima kubima po càga muu (05) leni mi ñima kubima po i ligi pama (SEFE).

Àmá, ban den tieni li binli 2023 li táanciali ki baa le mi diema nni yaa kpeni n ye ñima bonpiakaala kubima (SIRI) n poa ki da naani, bi den sua ke poadi ye li boginli sanbila nni, mi ñima loagu leni i ligi kubima nni, ke li siendi ban bogini yaa tuona mi ñima kubima po. Ki fidi ki paani laa paka kuli po n teni ke Gufenema go táa li jagili ki bàà cilini yaa càgìli n baa yaa gobidi li bebe i kpeni ñima tuona ke bi yi laa càgìli « mi diema kpeni càgìli », li yeli koabigima po ban yedi ANABA.

ANABA yeni tie Nakanbé, Gulima, Lipitaako, Komoe leni Muhunni kpeni càga n táani ki mali yaa càgìli.

Laa másienkaama tili táama bàà teni ban cilini mi diema kpeni kubima càgìli lan todi ban bàà ki yaa kubi mi ñima bonpiakaala ñama.

Mi másienkaama titaali waani ke Bàaló baa diedi yaa tinfanma lanba n tie 495 leni 501 ki jaligi ki maa a dieduakaana mi diema niba kuli todima po Wagidigu dogu tinbuocagiluobili (arondisema) n° 06 gaanilindima nni, li ñianli (sekiteeri) 29 nni.

Yaala n tie « Bulicina Faso Deenwu Ka Soowu » tuonboginkaana soanma po, mi diema nni i dociami tinfanma ñanbima tuonsoanjaali (SONARURI) cili a

diegbenga maama tuona Wagidigu dogu tinbuocàgiluobili (arondisema n°06) nni. Laa tuona baa soani yaa tinfanma n bua ki pundi metirikaare (m²) 444 024 ke mi lanba tie 495 leni 501, li ñianli (sekiteeri) 29 nni.

Àmá, laa kaanu fanma nni metirikaare (m²) 346 905 boagidi ki tie a diegbenga maama tuonsoanjaayenli n die yaama. Yeni, bàá ke laa tuonsoanjaali pia mi fanma bààma tili, li nan dáá pia laa fanma diedima tili.

Yaa másienkaama tili n tie ne sugini ki teni Bàaló n diedi laa tinfanma ki bàà ki maa a diegbenga bi niba po.

Laa másienkaama tili táama baa teni Bàaló n bàà ki diedi yaa tinfanma lanba n tie 495 leni 501 ki jaligi ki maa a dieduakaana mi diema niba kuli todima po Wagidigu dogu tinbuocagiluobili (arondisema) n° 06 gaanilindima nni, li ñianli (sekiteeri) 29 nni.

I.3. YAA KOANBADIEGU N DIE TI DIEMA LENI DIETOAMA SIIGA DANTAADI KANI.

A Koanbála Táánli táá **tiwaankaali** ke li tuugi leni Gabon diema n tieni yaa miabu ki bua ki soani o tondo Bulicina Faso nni laa dogiliedi siigi ñantaadi po.

A Koanbála táánli tùó ke ban dini li báli o joa **Tieri Yvoni Miseli N’GOMA**, wan tua Gabon tondo Bulicina Faso nni, ki yaa ye Wagidigu dogu nni.

I.4. TI DIEMA NIBA TUONSOANBA KOANBADIEGU KANI

A Koanbála Táánli táá **másienkaama tila lie (02)**.

Mi másienkaama tikpiali waani Bulicina Faso nni li tuonli yogini Bàaló saliwudo tuonsoandiedi nni.

Bulicina Gufenema den táá li binli 2015, ciyia dana 15 mi másienkaama tili yaama yaa lanba n tie n°2015-1048/PRES-TRANS/PM/MFPTSS ki cilini li

tuonli jiidima yogunu soaginma Bàaló saliwudi tuonsoandiedi nni. Laa másienkaama tili, yaali n den waani li tuonli jiidima yogunu soaginma bebe den bolini yaa másienkaama tili n den táa li binli 2003, cimuu dana 20 ke li lanba tie n°2003-240/PRES/PM/MFPRE, ki waani ban bili màamà li tuonli jiidima yogunu soaginma daali po Bàaló leni boncéli danba saliwudituonsoandiedi nni.

Àmá laa másienkaama tili nni moko, li báli máama náá gagidi ki waani li tuonli yogini n bili màamà Bulicina Faso nni Bàaló saliwudo tuonsoandiedi nni, ki teni ke másienkaama titoali n doagidi ki waani li tuonli jiidima yogunu soaginma daali n baa ñoadi màamà.

Mine másienkaama tilieli táama baa teni ban bàà Bulicina Faso nni yaa báli máama n gagidi ki waani li tuonli yogini Bàaló leni bonceli danba saliwudo tuonsoandiedi nni.

Mi másienkaama tilieli waani li tuonli jiidima yogunu soaginma n baa ñoadi màamà Bulicina Faso nni Bàaló leni boncéli danba saliwudo tuonsoandiedi nni.

Li tie yaa másienkaama tili n bua ki pegidi yaa másienkaama tili lanba n tie n°2015-1048/PRES-TRANS/PM/MFPTSS, ban den táa yaama li binli 2015, ciyia dana 15 ki cilini li tuonli jiidima yogunu soaginma daali Bulicina Faso nni Bàaló saliwudo tuonsoandiedi nni leni yaa másienkaama tili n de tua mi lebidu, ban den táa yaama li binli 2017, piiga n cilie dana 21 ke mi lanba tie n°2017-1232/PRES/PM/MFPTPS.

Laa másienkaama tili goapegidima baa teni yaa báli máama lanba n tie n°001-2026/ALT, ban den den ñani yaama li binli 2026 ki cilini yaa dana n tie « fuodima bi tuonsoanba po ke bi ñmaligi kan wadi » ki tuugi leni li binli 2026, cilè dana 09 ban den ñani yaa báli máama ke mi lanba tie n°001-2026/ALT ki waani yaa dana ke bi tuonsoanba kan soani ke bi ñmapani ligi kan wadi leni yaa

dana n lebidi ki kan ji tua badu àmá ki baa ya tie tiadima leni jaanma bebe Bulicina Faso nni. Laa másienkaama tili nni, li go doagidi canyi « li tuonli jiidima yogunu foagidima daali» n bundi yaali , ki waani ke laa daali nua bonceli danba saliwudo tuonsoandiedi moko, ki go kadi ki doagidi li tuonli jiidima yogunu foagidima daali, li tuonli n baa táá ki ban sedi yaa leero.

Laa másienkaama tili tááma baa teni ban bàà Bulicina Faso nni bálímácànma yaala n tie li tuonli jiidima yogunu foagidima daali n baa ñoadi màamà Bàaló leni boncelidanba saliwudo tuonsoandiedi nni.

I.5. KU DIEGU YEMA LENI TORIYABA KOANBADIEGU KANI

A Koanbála Táánli táá **másienkaama tili yenli** ki waani mi niñingbadima tuona n baa yaa ñoa màamà Bulicina Faso nni.

Li tieni a bina boncianla ke ti diema ye mi miligibiadima tuada moapaadima nni. Laa muali nni, mi niñingbadima tuona boncianla bua ki soani. Laa bonla po teni ke mi niñingbadima caga boncianla tiendi mi todima tuona lani n tie li ñandunli tataáncaga, Bàaló n ki die yaa tataancàga, mi diema nni tátaancaga, a jaandicàga leni bi todikaaba càga.

Bàá ke laa tataáncàaga kuli todi Bàalo moandili yaa niba n bàà li coagili po, laa càga coali n yabi màamà po teni ke poadi ye a gobidima nni, i làaabáali tenma nni, a tuona doagidibandima nni, leni yaa tuona n ki tie mi diema po tiladi soanma.

Yaa másienkaama tili n tie ne bua ki pugini mi gobidima ñamu mi niñingbadima tuona nni, ki pugini u taajougu ñamu Bàaló tuonsoandiedi leni mi niñingbadima todikaaba siiga, ki teni Bàaló n baa ki yaa diidi bi tuona leni bi ligi n cuoni màamà.

Mine másienkaama tili táama baa teni yaa báli máama n pegidi mi niñingbadima tuona Bulicina Faso nni paalu n pugini..

I.6. YAA KOANBADIEGU N DIE TI BUUDI TUONA KANI

A Koanbála Táánli taa **másienkaama tila (03)**.

Mi másienkaama tikpiali waani ti buujiakaadi goabuuma bubuudicagili bubuudibanda táama leni bi ñama laa bubuudicagili nni sanbila.

Mi másienkaama tili yaali yaa lanba n tie n°68-211, ban den taa yaama li binli 1968, cinii dana 31 ki waani ti buujiakaadi goabuuma bubuudicagili bubuudibanda táama leni bi ñama laa bubuudicagili nni, náá ji tuugi leni moala ne ti buudi jama sanbila Bulicina Faso nni.

Lani yaa po, yaa báli máama n den taa li binli 2025, ciluoba dana 12 ke mi lanba tie n°009-2025/ALT, ki waani li biili leni u cuonu po ban bili yaa báli máama leni yaa lebidima n tieni li bujiali boginma sanbila nni teni ke ban den taa yaa másienkaama tili li binli 1968 ji bua lebidima.

Moala nne ban taa yaa másienkaama tili nni, yaala n tugi yuli ki tie boncanla tie ki tua bubuudibando sanbila puginma leni yaaba n bua ki tua bubuudibanda yela dianma yogunu dana wadima .

Laa másienkaama tili táama baa teni ti diema n bàà bálímápanma ti buujiakaadi goabuuma bubuudicagili bubuudibanda táama leni bi ñama laa bubuudicagili nni sanbila gobidima po.

Mi másienkaama tilieli waani ti buudi cuonu sieditili tuona nni mi dianma, i làabáali kubima bi i lebidima leni laa tili tienma n baa ñoadi yaa sanbila.

Li tie yaa másienkaama tili n baa teni ban den taa yaa báli máama li binli 2025, ciluoba dana 12 ke li lanba tie n°009-2025/ALT, ki waani li biili leni u cuonu po

ban bili yaa báli máama n tieni. Laa báli máama pugini boncànla ti buudi cuonu sieditila tienma po, ki doagidi yaa sanbicaana n tuugi leni i làabáali dianma, i kubima leni i ñanma ki go waani ti buudi cuonu sieditila tienma n baa yaa ñua màamà.

Yaala n tie boncànla ki tugi yuli laa másienkaama tili nni tie ke bi puni u sanu ti buudi saliwuudo tidianla yaaba n ye ti bujiadiedi nni n yaa dangi ti buudi cuonu làabáali ti buudi cuonu sieditili nni ki go pugini ki waani ke moala ti buudi cuonu sieditili n°1 leni n°2 tienma ji baa yaa pia i pànpàání.

Mine másienkaama tili baa teni ban pugini ti buudi cuonu sieditili tienma po yaa báli máama n ye paalu.

Mi másienkaama titaali waani ban dini yaaba li báli ke bi tua ti diema nni yaa cagibiga n gobidi Afiriki dogi nni u loagu kubima tuona sanbila boginidaginma (CONAHADA) gobidikaaba.

Laa másienkaama tili táama teni ke bi dini li báli niba yia (09 ke bi tua ti diema nni yaa cagibiga n gobidi Afiriki dogi nni u loagu kubima tuona sanbila boginidaginma (CONAHADA) gobidikaaba, bi cicibáli po, bina taa (03), ke li ñoadi nani lan bili màamà yaa másienkaama tili lanba n tie n°2021-0920/PRES/PM/MINEFID/MJDHPC, ban den taa yaama li binli 2021, ciyia dana 15 ki dini ti diema nni yaa cagibiga n gobidi Afiriki dogi nni u loagu kubima tuona sanbila boginidaginma (CONAHADA) gobidikaaba.

I.7. YAA KOANBADIEGU N DIE MI TAGIMA TUONSOANDIEDI, U KPENDU LENI U NUU TUONSOANBANMA TUONA KANI

A Koanbála Táánli taa **másienkaama tila lie (02)**.

Mi másienkaama tikpiali waani ke bi cilini Bàaló leni boncelidanba n tááni ki die yaa tuonsoanjaali àmá ke Bàaló ya biinu yabi ki cie ke bi yi laa tuonsoanjaali SINMI SAYELI.

Ti diema nni, sima tagima tuonsoandiedi yabi boncianla, ke li po teni ke sima tuona moko yabidi. Sima tagima tuonsoandiedi teni ke ti diema fidi ki tagi binli kuli sima tonninba 6 ki gedi tonninba 7, lani n bua ki yedi ke li ji bi naani n yaala ke sima baa dagidi ti diema nni hali ki ban puodi dotoe Afiriki nni. Àmá, leni Bàaló n tieni yaa moandili yeni kuli, sima go yen poadi ke li yen teni mi diema nni a kpenkpenditiamá n pugini sima ligi ki yaa kuadi ban bua yaa dunga.

SINMI SAYELI tuonsoanjaali cilinma yegi leni ti diema n pia yaa nunlema mi tagima tuona po ki go baa teni Bàaló n bàà ki bogini ki go yaa gobidi nama sima tagima leni o kuadima tuona. Li tie Bàaló leni boncelidanba n tááni ki die yaa tuonsoanjaali àmá ke Bàaló ya biinu yabi ki cie. Laa tuonsoanjaali n sugini yaala li bontianla tie:

- ki pugini ti diema yudiedima mi tagima tuona nni;
- ki todi sima dunga n wadi ki sedi dunyenga;
- ki todi a dieduakaana maama tuona, i sani leni barasinba tienma leni yaala n bua màama kuli tuona;
- ki teni Bàaló n baa ki yaa gobidi mi findima sanbimoanli tuona.

SINMI SAYELI tuonsoanjaali cilima baa luodi yenma tuona 413 ki yuandi ki pugini tuona 2 000.

Laa másienkaama tili tááma baa teni sima tagima tuonsoanjaali, SINMI SAYELI tuona n cili .

Mi másienkaama tilieli waani Bàaló leni boncelidanba n tááni ki die yaa tuonsoanjaali àmá ke Bàaló ya biinu yabi ki cie ke bi yi laa tuonsoanjaali SINMI SAYELI mabilikaama tila n tie ya.

Laa másienkaama tili táama baa teni Bàaló leni boncelidanba n tááni ki die yaa tuonsoanjaali àmá ke Bàaló ya biinu yabi ki cie ke bi yi laa tuonsoanjaali SINMI SAYELI n bàà yaa báli máama tila n dagidi li tuonli cenli ñamu po.

II. I LÀABÁALITENKE

II.1. Li koanbagbeeli yaali n die ti diema tinbuona gobidima leni a sancena tuona den puni laabaali a koanbala taanli ke Bulicina Faso den soani nicagili ke li gedi Itali diema ki ban gaani ki diidi a tuonsoanjaana Ronmi, Savonni leni Awositi dogi nni. Li den tua li binli 2026 cimuu dana 16 ki gedi 23.

Li nicagili yeni sancenli mayuli tie ki pugini ti fidima i laabaali baama nni ti diema guudima leni jalibu buoli pò; ki pugini mi tuginma a tuonsoanjaana siiga, ki pugini ti tuonsoantiadi leni ti diema tuonsoanba banma.

Laa sancenli todi ke Itali diema leni Bulicina diema tuonsoanjaana ya n die mi diema guudima leni jalibu buoli pò boeni leni a ya ki baa mi banma leni bu nunfanbu ki pugini. Li teni ke Bulicina Faso nicagili baa li yantiali ki baa tieni mi tuginma leni Itali yaaba laa sanbili nni.

Mi gaanidiidima puoli, bi den noanli ki sua ke li pundi mi tuginma n tieni Savonni Iniverisite leni Bulicina Faso siiga ke lan todi mi banma boagidima, ki go todi Bulicina tuonsoangbenga bangima mi yebiadima loagidima leni mi guunma pò.

II.2. Yaa koanbali n die i làabáali, ku màasùagu, i nii tagima leni yanluadi goada tuona den togidi a koanbala taanli ki waani Bulicina piama ŋmaalo badu yu n den tieni mi taabuanaama (4) n cuoni maama.

U badu yeni lúódíma den tua li binli 2026 cinaa dana 17 Wayiguya dogu nni leni yaa mayucianli n tie na : « **Ti piama leni ti màasùadi buoli : a tuonsoanla moandili, bi puogili leni bi tuonli** ». Ti piama ŋmaalo badu den ban gbeni li binli 2026 cimuu dana 18 leni li pamanli kelima u badu den cuoni bonjanla.

Ban bogini mi ñuadima kaani yi baa yaala n pundi niba **26 516**. Ti diema tuonsoandiegu yaagu n guu ti tiakpedi leni ti màasùadi tiadi yaadi n ŋani ki pia mayuli mo baa niba **36 749**, ki sua yaa binli n pendi laa yogunu nni, li den tie

niba 17 953. Tin baa yaa laabaali laa tuonsoandiedi buoli toadi kani todi ke ti baa mi ñuadima danba yaaba n pundi niba **129 012**. Ti piama leni ti màasùadi kaani bontoe baa yaa niba n cua ki ñuadi ke li pundi niba **120 027**. Yaala n pugidi tie ke yaa niba n cua a tuonsoanjaana, ti koanbadiedi leni Komininba yeli po coali pundi niba **1 572**.

Li den baa yaa tuona n soani boncianla laa badu pò ti diema nni. Laa tuona siiga tiama nne : « Min gaani ki lindi n dogu », a tikpela kubima daali, Afiriki piama daali, a danbogida leni ti màasùadi daali, mi ñuàdima bontagikaala, ban ñani yaa tili mi taabualiema ki waani tin pia yaa niba ke bi tie piama ki fo, leni Bulicina faso piama ñmaalo badu desiyonba nni.

II.3. Ku diegu yema leni toriyaba koanbali wani yua n da tuuni moala po li laafiali koanbali yeli nni kelima waa ye likani, den puni laabaali a koanbala taanli ke ti baa bogini taabuama 24 pò Afiriki màasùadi ñoagi daali badu leni ti diema màasùadi ñoagi danleleeda badu taabuama 14.

Laa tuona kuli mayuli tie ki teni ti màasùadi ñoagi n kpedi ki suagi liiga ki go baa mi fuoma.

Ban gandi yaa mayucianli ti diema màasùadi ñoagi danleleeda badu pò tie : « **Ti diema màasùadi ñoagi yi ke bi ñanbi ki pugini i kúánma li yianbuuli sanbila nni : tin pia lipo yaa muana leni yaa sanbila n ye ki baa teni tin diedi ti yuli li laafiali tuona nni** ».

Ti diema màasùadi ñoagi danleleeda badu baa tieni li binli 2026, cinii dana 31 ki gedi ciyia dana 5. Afiriki màasùadi ñoagi daali badu mo baa tieni li binli 2026 ciyia dana 5. Yini badi lie yeni kuli baa tieni Manga dogu nne, lan tie Nasinon desiyon nni.

Ban guu yaa niba laa badi pò tie ti màasùadi ñoagi tuonsoanla 1000, lingida 80, ñoagikuada 150 leni niba 7000 yaaba n baa cua mi ñuàdima pò.

Laa badi mayuli tie ki teni ti màasùadi ñoagi tuonsoanla n boagidi mi banma leni biyaba, yeni lan todi li yianbuuli n baa u gbanmanu ki pugini, a yiama yaaba n ca ti lotodiedi nni mo yaa pamanli n pugini.

II.4. Yaa koanbali n die mi tagima tuonsoandiedi, u kpendu leni u nuu tuonsoanbanma tuona puni a koanbala taanli yaa laabaali n tuugi leni porose yua ke bi bogini ki baa pàndi li yantiali tagima balimaama ki go teni bi puoba n bandi laa balimaama ke lan todi ban diedi bi yula li nukubili nni .

Laa porose mayuli tie ki ñii li yantiali tagima balimaama pò ki téni bi puoba n pugini bi fídíma mi tàgima pò bu kpenkpendikpaabu sanbili nni. Lani yaapo porose yeni baa pugini bi puoba fídíma mi tàgima pò, mi tuonsoanbancanma leni ti tuonsoantiacandi baama pò, ki teni Afiriki tuonsoanjaali OYAPI n baa bi pò li yantiali tagima sieditila ke lan todi ban kubi ki go guudi ban tagi yaala .

Laa porose tie sanbimoanle i ligi baama bi puoba tuona pò. Li baa todi boncianla bi puoba n diedi bi yula li nukubili nni.

III. BAN DINI YAABA A BÁLA

III.1. BAN DINI YAABA A BALA YENDO YENDO TUONA PO

A. YAA KOANBADIEGU N DIIDI BU KPAABU, MI ÑIMA, LI YANWUBILI LENI MI ÑIMA NNI BONPIAKAALA TUONA KANI

- Ti lielo Mifitasé Abirahami **SURA**, o lanba li tuonli nni tie **279 896 T**, o tie mi tuonsoanbanma tuona tundikoa, bi dini o li báli ke o tua mi ñima tuonsoantiadi tagima tuonsoanjaali (SOSIMA) Yudaano;
- Ti lielo Sésili **SARANBE**, o lanba li tuonli nni tie **321 966 R**, o tie li yanwubili tuona bando, bi dini o li báli ke o tua yaa bangicagili n gobidi mi bangipuginkaama mi diema nni li yanwubili tuona pegidikaaba cogidieli kani Yudaano.

B. YAA KOANBADIEGU N DIE U LOAGU LENI I LIGI KUBIMA TUONA KANI

- Ti lielo Asimi **SERIBO**, o lanba li tuonli nni tie **200 141 R**, o tie Bàaló ligidiedi tuona diidikoa, bi dini o li báli ke o tua Iniverisité Fositen Sié Tiakubilo;
- Ti lielo Hibeeri **KUDA**, o lanba li tuonli nni tie **225 993 M**, o tie polisi komiseeri bi dini o li báli ke o tua li guunli koanbadiegu Tiakubilo.

C. KU DIEGU YEMA LENI TORIYABA LENI KOANBADIEGU KANI

- Ti lielo Mumuni **KI**, o lanba li tuonli nni tie **46 394 H**, o tie a biñinda cogidiena tuona goandikoa, bi dini o li báli ke o tua Tuonsoandiedi tuona goandikoa;
- Ti lielo Ali Bémé **KONE**, o lanba li tuonli nni tie **47 766 D**, o tie ti gbannandi tadingu boncianla cógú goandikoa, bi dini o li báli ke o tua Tuonsoandiedi tuona goandikoa;

- Ti lielo Amisanu Noweli **TANKPANI**, o lanba li tuonli nni tie **52 254 Z**, o tie ku koanbadiegu tuonsoandiedi gobidikoa, bi dini o li báli ke o tua Tuonsoandiedi tuona goandikoa;
- Ti lielo Hamidu **DIALO**, o lanba li tuonli nni tie **57 228 T**, o tie ku koanbadiegu tuonsoandiedi gobidikoa, bi dini o li báli ke o tua Tuonsoandiedi tuona goandikoa;
- Ti lielo Abidu **BALIBONE**, o lanba li tuonli nni tie **41 064 E**, o tie ku koanbadiegu tuonsoandiedi gobidikoa, bi dini o li báli ke o tua Tuonsoandiedi tuona goandikoa;
- Ti lielo Jan-Mari Kulodi Adama Wendinso **TIENDIREBEWOGO**, o lanba li tuonli nni tie **47 775 D**, o tie ku koanbadiegu tuonsoandiedi gobidikoa, bi dini o li báli ke o tua Tuonsoandiedi tuona goandikoa;
- Ti lielo Wanemanegiré Mari Madeleni **TUGURI**, o lanba li tuonli nni tie **258 157 S**, o tie yaa tuonsoanba n moa ke paadima n da ye joa leni pua siiga tundikoa, bi dini o li báli ke o tua tuonsoandiedi tuona goandikoa.

D. YAA KOANBADIEGU N DIE TI BUUDI TUONA KANI

Bi dini li bàli yaa niba yaa yela ŋua ne ke bi kua yaa cagibiga n gobidi Afiriki dogi nni u loagu kubima tuona sanbila boginidaginma (CONAHADA) nni bi cici bàli pò bina taa (03).

Yaa koanbadiegu n die ti buudi tuona kani:

- Ti lielo Bépoadi **SININI**, o lanba li tuonli nni tie **130 491 S**, o tie Bujialo, o tua ti lielo Isa Safériba **FAYAMA** lèbidu ;
- Ti lielo Nawalagunba Safiéta **KOANDA/DERA**, o lanba li tuonli nni tie **130 278 T**, o tie Bujialo, o tua ti lielo Matiasa **NIANBA** lèbidu.

Yaa koanbadiegu n die u loagu leni i ligi kubima tuona kani :

- Ti lielo Sugirinoma Kirisitini **BELEMI/SAWADOGO**, o lanba li tuonli nni tie **235 906 B**, o tie Bàaló ligidiedi goandikoa, o tua ti lielo Yakuba Sabiré GUBA lebidu.

Yaa koanbadiegu n die mi diema tinbuona gobidima leni a sancena tuona kani:

- Ti lielo Kayi Séline Sala **KONE/DIALO**, o lanba li tuonli nni tie **130 477 W**, o tie Bujialo, o tua ti lielo Mahamudu SANPALIGIRE lebidu.

Yaa koanbadiegu n die ti diema leni dietoama siiga ntantaadi kani:

- Ti lielo Rasimané **KONGO**, o lanba li tuonli nni tie **229 942 E**, o tie diema leni mi yama tuginma tuona tundikoa, o tua ti lielo Kirisitomi Bowurosigé SANU lebidu.

Mi diema niba tuonsoanba koanbadiegu kani:

- Ti lielo Berinaari **KINI**, o lanba li tuonli nni tie **97 993 Y**, o tie Bi tuonsoanba sanbila gobidikoa.

Yaa koanbadiegu n die a cogibigbenga cógú leni mi bancanma linginma tuona kani:

- Ti lielo Ñiduba Rosé **LANU**, o lanba li tuonli nni tie **271 353 F**, o tie mi lingima cogibicanbaa, o tua ti lielo Usimani BUGUMA lebidu ;

Bulicina Faso nni Bankinba leni a ligicaga cagicianli kani:

- Ti lielo Alaji Bakali **KULIBALI**, o lanba li tuonli nni tie **00205**, o tie li bali maama bando, o tua ti lielo Fuloransi BEWUNDE lebidu.

Bulicina Faso nni u kpendu leni masini bontagikaala tuonsoankaani cagili kani :

Ti lielo Alidu **KOBIRE**, o tie li bali maama bando li báali linginma tuona nni, o tua ti lielo Bintu BOLI/JIBO lebidu.

E. YAA KOANBADIEGU N DIE A COGIBIGBENGA COGU LENI MI BANCANMA LINGINMA TUONA KANI

- Ti lielo Mariseli **BARO**, o lanba li tuonli nni tie **53 348 C**, o tie u cogu saliwuudi diedi gobidima tundikoa, bi dini o li báli ke o tua Iniverisité Noribeeri SONGO Tidianciamo ;
- Ti lielo Bapio Valeri Elvira Jan Telesifori **BASIE**, o lanba li tuonli nni tie **249 852 K**, o tie mi lingima cogibicanbaa, bi dini o li báli ke o tua yaa cagili n guu i tiidi, ti yandi buoli leni mi gaanilindima jalibu paanma leni mi jigicuoma maama Yudaano;
- Ti lielo Wendi Rabo Matirien **RUWANBA**, o lanba li tuonli nni tie **258 321 T**, o tie a dojaana niba yema findima tuona bando, bi dini o li báli ke o tua yaa cagili n guu i tiidi, ti yandi buoli leni mi gaanilindima tuonboginkaana leni li tataantuona Yudaano ;
- Ti lielo Timoté **BUGIMA**, **O lanba li tuonli nni tie 257 210 S**, o tie Iniverisité cogibicanbaa, bi dini o li báli ke o tua yaa cagili n guu i tiidi, ti yandi buoli leni mi gaanilindima mabikaama yaama ke bi ñani leni yaa magalikaama n pundi bi bujiaba kani mááma Yudaano.

III.2. BAN DINI YAABA A BÁLA A TUONSOANJÀANA YÈLI PÒ

A Koanbála Tánli den baa ban dini yaaba a bála a tuonjaana tuona boginma pò:

- ti diema tuonsoanjaali yaali n guu i wulagbikaani (ONASINMI) li guunli koanbadiegu yèli nni ;
- li tuonjaali yaali n die ti lotoli tuonsoantiadi kubili (SOSEMABI) li laafiali koanbadiegu yèli nni

A. LI GUUNLI KOANBADIEGU

A Koanbála Táanli taa **masienkàama tiyenli** ki dini li bàli ti lielo Maliyama **NONBIRE**, O lanba li tuonli nni tie **245 213 G**, o tie Bàaló ligidiedi goandikoa, o tua ti diema tuonsoanjaali yaali n guu i wulagbikaani (ONASINMI) tuona gobidima cagili Gobidikoa Yaa koanbadiegu n die u loagu leni i ligi kubima tuona yèli nni, Bàalo yèli pò, o cici báli pò bina taa (03), ki tua ti lielo Léwon KULA lèbidu.

B. LI LAAFIALI KOANBADIEGU

A Koanbála Táanli taa **masienkàama tiyenli** ki dini li bàli ti lielo Dawuda **WATARA**, o tie **Minteligbeeli**, o tua li tuonjaali yaali n die ti lotoli tuonsoantiadi kubili (SOSEMABI) tuona gobidima cagili Gobidikoa, yaa koanbadiegu n die bu toabu leni u báadogu guudima tuona yèli nni, Bàalo yèli pò, o cici báli pò bina taa (03), ki tua ti lielo Mahamudu SANU lèbidu.



www.sig.gov.bf

Gufenema Mâsoagindo

